

# Bun di bun onn – e buna decada!

DA DAVID TRUTTMANN / FMR

In proverbi surmiran, notà en la gigantica «Crestomazia retorumantscha» da Caspar Decurtins, di: «In onn è lung, e blers passan spert.» En sazez è quai ina constataziun laconica: In onn cuzza ditg, però blers onns passan svel. Ma en quests dis da midada da l'onn ha il proverbi laconic anc in minz dapli vardad. Pertge? Perquai che quests dis è ida a finir ina decada (2010–2019) e nus avain gist nizzà la proxima (2020–2029). Ina decada para gea in'eternitad. Ma guardond enavos è tut i sgarschaivel svel. In pèr exempels.

Il telefonin ha conquistà l'integrità chantun dal mund: Nus al duvrain per pajar en stizun e sco lectura sin tualetta. L'um il pli privlus dal mund è vegnì mazza dad ina truppa d'elita.

Ma era senza Osama Bin Laden resta il mund malsegir. Las medias socialas èn daventadas las novas maisas radundas, cun la differenza che blers n'han nagins scrupels da sa trair ora blut. Nus construim chasas da minergia ed auzain globalmain tuttina il consum d'energia. La primavaira araba ha procurà per pasch e guerra en ina, ed a la fin dals quints per in'unda da fugitivs ed a la fin da la fin dals quints per ina vieuta dretga en la politica europeica. Millieras da hashtags han fatg carriera: #metoo, #happy, #holiday e #picoftheday – basta ch'els sajan englais. Ma en tut las tensiuns cun fugitivs ch'arrivan en Europa di Angela Merkel LA frasa da la decada: «Wir schaffen das!» Gea, propi? Vegnin nus a frida cun tut? Il mund sa mida rapid, adina pli spert, tschertezas vegnan in-

tschertas, ed igl è grev da s'imaginar ch'i po ir vinvant en quel tempo.

Etar nus en il Grischun rumantsch? – Tgeninas eran nossas tematicas, nossas istorgias dals davos 10 onns? Cler, il rumantsch grischun ha procurà per chaus cotschens. Ed il luf. E las segundas abitaziuns. Era questa pitschna survista è incumpleta. Ed en cumparegliaziun cun ils fatgs mundials para ella ferm banala: segundas abitaziuns, luf ed rg – quai èn gea piculezzas. Però tar tuttas trais tematicas datti in numnader comunabel. Sut il stritg vai numnadamain per ina dumonda impurtanta: Tgi essan nus? Gea, tgi essan nus, e co ans «stalegiain» nus cun midadas, las qualas nus iniziain e purtain sezs, cun midadas che vegnan da dadora e che paran apparentamain «estras»?



David Truttmann, il schefredactor da la FMR, la nova Fundaziun Medias Rumantschas.

FOTO F. ANDRY

In recept na para en mintga cas betg dad avair bunas vistas da success, numnadamain quel da tegnair a tut pudair vi da l'imagina-

ziun che tut stoppia funcziunar sco enfin da qua. A nus na resta nagut auter che d'ans confruntar cun las midadas, las empren-

d'enconuscher cun viv interess ed alura ans definir activamain da nov. Nus avain (quasi) tut en ils agens mauns. Il luf è turnà ed igl è bain noss'incumbensa ed aventura d'emprender da viver cun el. Las segundas abitaziuns? Ellas èn damai bajegiadas e limitadas. Quai è ina nova situaziun economica, ma er in'interessanta sfida co che noss chantun pudess uschiglio anc sa sviluppar. Ed uss anc il tema il pli delicat, il rumantsch grischun. Gea, sche vus avais legì enfin qua quest editorial, alura essan nus tuts ensemen sin fitg buna via da suandar la frasa nunspectaculara dad Angela Merkel: «Wir schaffen das!» En tgenina moda e maniera er adina.

En quel sen: Bun di bun onn e surtut buna decada!